

- सेना दिवस रे मौके काल जयपुर मांय भव्य कार्यक्रम व्हेला-आर्मी परेड़ मांय देश रा गौरव अर शक्ति रो प्रदर्शन कर्यो जावेला-मुख्यमंत्री इण ने प्रदेश खातर गर्व रो दिन बताया।
- प्रधानमंत्री नरेन्द्र मोदी, काल नई दिल्ली मांय राष्ट्रमंडल देशां री संसदां रा अध्यक्षां अर पीठासीन अहलकारां रा सम्मेलन रो उद्घाटन करेला।
- सूर्य रा उत्तरायण रो पर्व मकर संक्रांति आज धार्मिक उच्छाव रे सागे मनायो जा रह्यो है-जयपुर समेत केई ठौड़ां माथे पतंगबाजी रो उच्छाव।
- प्रदेशभर मांय करड़ी ठण्ड रो असर कम व्ह्यो-आवता हफ़ता पूर्वी राजस्थान मांय मावठ पड़ सके है।

000

राष्ट्र, काल देश रा स्वाभिमान अर आन-बान ने प्रदर्शित करतो सेना दिवस मनावेला। इण टेम सेना दिवस री मुख्य परेड़ जयपुर मांय राखी जा री है। इण मौके जगतपुरा मांय महल रोड़ माथे देश रा गौरव अर शक्ति ने प्रदर्शित करती आर्मी परेड़ राखी जावेला। जिण मांय भारतीय सेना रा जवान आप रा शौर्य अर पराक्रम री छटा दिखावेला। इण दौरान सेना री आधुनिक सैन्य अर युद्धक क्षमता दिखायी जावेला। स्वदेशी तकनीक सूं विकसित मिसाइल प्रणालियां, अत्याधुनिक टैंक, सैन्य वाहन, ड्रोन, एंटी एयर अर एंटी टैंक हथियारां रे जरिये सेना री सामरिक शक्ति री जीवंत झांकी दिखायी जावेला। ऑपरेशन सिंदूर री झांकी, ब्रह्मोस मिसाइल, हेलिकॉप्टर आधारित हथियार प्रणाली अर रोबोटिक डॉग्स भी इण परेड़ रो खास आकर्षण व्हेला। आर्मी परेड़ बाबत् जिला प्रशासन अर सेना रा आला अहलकार आज शहर रो दौरा कर र व्यवस्थावां रो जायजो कर्यो। मुख्यमंत्री भजनलाल शर्मा आर्मी डे परेड़ रा जयपुर मांय व्हे रह्या आयोजन ने प्रदेशवासियां खातर गर्व री बात बताता थकां इण ने प्रदेश री शौर्य गाथा ने आगे ले जाबा वाळो कदम बताया। वे कह्या के ओ ऐतिहासिक आयोजन, राष्ट्रभक्ति, सम्मान अर गौरव री भावना ने नुवी ऊँचाइयां ताई ले जावेला।

000

आज सशस्त्र बल पूर्व सैनिक दिवस मनाया गयो। इण मौके देश रे वास्ते आप रा कर्तव्यां रो पालन करबा वाळा अर आप रो सब कुछ न्योछावर करबा वाळा सैनिकां रो सम्मान कर्यो गयो। न्यारा-न्यारा सैन्य स्टेशन अर संगठणां री कानी ऊँ कार्यक्रम राख्या गया। सशस्त्र बल पूर्व सैनिक दिवस रे मौके नई दिल्ली मांय राख्या कार्यक्रम मांय रक्षा मंत्री राजनाथ सिंह कह्या के पैली रा सैनिक राष्ट्रीय चेतना ना जीवंत स्तंभ, सामूहिक साहस रा प्रतीक अर आवती पीढियां ने प्रेरणा देबा वाळा है। श्री सिंह कह्या के पैली रा सैनिक राष्ट्र निर्माण रा हर मोर्चा माथे योगदान दे र अनुशासन, नेतृत्व अर साहस जेड़ा गुणां सूं समाज ने रास्तो दिखावे है। श्री सिंह कह्या के पूर्व सैनिकां री वर्दी रो रंग अर काम री ठौड़ भले ही बदल जावे पण देशभक्ति अर सेवा री भावना अडिग रहवे है।

000

प्रधानमंत्री नरेन्द्र मोदी, काल नई दिल्ली मांय राष्ट्रमंडल देशां री संसदां रा अध्यक्ष अर पीठासीन अहलकारां रा 28 वा सम्मेलन रो उद्घाटन करेला। इण सम्मेलन मांय 42 राष्ट्रमंडल देशां अर चार अर्ध-स्वायत्त देशां री संसदां रा अध्यक्ष अर पीठासीन अहलकार भाग लेवेला। सम्मेलन मांय मजबूत लोकतांत्रिक संस्थावां ने बणाया राखबा मांय अध्यक्षां अर पीठासीन अहलकारां री भूमिका समेत समकालीन संसदीय मुद्दा माथे चर्चा व्हेला। सम्मेलन मांय संसदीय कामकाज मांय आर्टिफिशियल इंटेलिजेंस रा इस्तेमाल, सांसदां माथे सोशल मीडिया रो असर, संसद रा बारा मांय लोगां री समझ बढ़ावां समेत केई मुद्दा माथे चर्चा व्हेला।

000

केन्द्रीय पर्यावरण, वन अर जलवायु परिवर्तन मंत्री भूपेंद्र यादव अरावली पर्वतमाला मांय पारिस्थितिक संरक्षण री कानी सरकार रो वचन दोहरायो। वे कह्या के अतिक्रमण अर अवैध खनन ने रोकबा खातर अरावली री करीब 97 किलोमीटर राजस्व भूमि ने स्थायी संरक्षित वन ऐलाण कर्यो गयो है। आज नई दिल्ली मांय अरावली परिदृश्य रा पारिस्थितिक पुनर्स्थापन माथे राख्या राष्ट्रीय सम्मेलन मांय श्री यादव प्रधानमंत्री नरेन्द्र मोदी रा देश भर मांय 26 करोड़ हेक्टेयर खराब भूमि री पुनर्स्थापन रा मिशन रा बारा मांय बताया। वे कह्या के अरावली ग्रीन वॉल परियोजना मांय 6 लाख 45 हजार हेक्टेयर खराब ज़मीं री पिछाण करी गयी है, जिण मांय सूं 2 लाख 70 हजार हेक्टेयर ज़मीं री पुनर्स्थापन गुजरात, राजस्थान,

हरियाणा अर दिल्ली मांय करी जा रही है। श्री यादव इण बात माथे जोर दिया के विकास ने परिस्थिति ने ध्यान मांय रख र आगे बढ़नो चाहिजे। वे कह्या के सरकार पारिस्थितिक संतुलन बणाया राखबा खातर कड़ी कोशिश कर रही है।

000

सूर्य रे उत्तरायण रो पर्व मकर संक्रांति आज देश-प्रदेश मांय धार्मिक उच्छाव अर परम्परां रे सागे मनायो जा रह्यो है। लोग नदियां मांय पवित्र स्नान कर दान-पुण्य कर्या, पशुआं ने चारो खिलाया। वटिने मिन्दरां मांय भगवान ने तिल सूं बणी मीठाईयां रो भोग लगा रह्या है। प्रदेश मांय कई ठौड़ा माथे मकर संक्रांति रे मौके परम्परागत तरीकां ऊँ पतंगबाजी करी जा री है। जयपुर री विश्व प्रसिद्ध पतंगबाजी ने देखबा खातर बड़ी संख्या मांय सैलाणी पूग्या। पर्यटन महकमा री कानी ऊँ जल महल री पाळ माथे पतंग उत्सव राख्यो गयो। जिण मांय मुख्यमंत्री भजनलाल शर्मा अर उपमुख्यमंत्री दिया कुमारी पतंग उड़ा र लोगां ने संक्रांति री बधाई दी। मुख्यमंत्री आप रा संदेश मांय कह्या के यो पर्व आपसी मेल-मिलाप, उच्छाव अर सकारात्मक ऊर्जा रे सागे जीवन मांय नई उमंग भरबा रो दिन है। मकर संक्रांति रे मौके जयपुर मांय दिनभर खास उच्छाव रहवे है। अटे टाबरां रे सागे बड़ां लोग भी छतां माथे दिन भर पतंगबाजी रो मजो ले रह्या है। एक रपट -

प्रदेश मांय रह रिया दक्षिण भारत रा लोग आज परम्परागत तरीका ऊँ पोंगल रो तिवार मनायो। दूजी कानी कोटा मांय बंगाली समाज रा लोग गंगा रो वाहन मान्या जाबा वाळो मगरमच्छ री मूर्ति री पूजा करी। इण मौके शहर मांय दिनभर पतंगबाजी रो दौर चाल रह्यो है। चूरु मांय भी दुकानदार इण मौके तुलादान कर्या। वटिने मारवाड़ हलका रा जिला मांय सुहागिनां 13 चीजा रा दान री प्रथा करी। भीलवाड़ा रा धनोप मांय रियासत काल सू चली आ री दड़ा प्रथा निभाई गई। इण रे जरिये गांववाळा आवता बरस री भविष्यवाणी बाबत् अटकला लगायी।

000

सीकर मांय जयपुर-बीकानेर राजमार्ग माथे फतेहपुर रे कने आज एक सड़क हादसा मांय छह महिलावां री मौत व्हे गयी। जिला कलेक्टर मुकुल शर्मा आकाशवाणी ने बताया के हादसा मांय दो महिलावां अर एक मोटयार घायल व्हयो है जिण ने सीकर रा जिला सफाखाना मांय भर्ती करायो गयो है। घायलां री हालत गंभीर बणी व्ही है।

000

मुख्य सचिव वी. श्रीनिवास आज कोटपूतली-बहरोड़ जिला रा दौरा माथे रिया। वणा बानसूर मांय पीएम कुसुम योजना रे तैत बण्या सोलर पॉवर प्लांट रो जायजो कर काश्तकारां सू चर्चा करी। मुख्य सचिव जिला कलेक्टर महकमां मांय अहलकारां री बैठक ली अर सरकार री योजनावां री प्रगति री समीक्षा करी।

000

पौष माह बीतबा रे सागे ई आ दिनां प्रदेशभर मांय करड़ी सर्दी रो असर थोड़ो कम व्हे रह्यो है। बीत्या कुछ एक दिनां सू तापमान मांय मामूली बढ़ोतरी सू लोगां ने राहत मिली है। हालांकि शेखावाटी हलका रा जिलां मांय हाल भी कमती रो तापमान 5 डिग्री सेल्सियस सू नीचे चाल रह्यो है। मौसम महकमां रे मुजब बीत्या 24 घंटां मांय सब ऊँ कम 1 दशमलव 4 डिग्री सेल्सियस तापमान बीकानेर रा लूणकरणसर मांय दर्ज कर्यो गयो। विभाग रे मुजब राज्य रा बत्ता इलाकां मांय इण हफता मौसम सूखो रह सके है। इण रे पछे भरतपुर अर जयपुर संभाग मांय कुछ एक ठौड़ां माथे मावठ पढ सके है। महकमो आवता हफता उत्तरी हलकां मांय कटे-कटे टण्डी हवावां चालबा अर कोहरा रा हालात बणवा रो अदेशो जतायो है वटिने सरहदी जिलां अर शेखावाटी हलका मांय आज भी केई ठौड़ां माथे कोहरा रो असर रियो। म्हाणी हनुमानगढ़ खबरनवीस बताया के जिला मांय कोहरा री वजह सू लोगां ने गाड़िया चलावा मांय परेशानी व्ही।

इण बीच, माउंट आबू मांय पड़ री सर्दी रो आनंद लेबा खातर राजस्थान अर पड़ौसी राज्य गुजरात सू बड़ी संख्या मांय सैलानी पूग रह्या है।

000